

Attenziun: La reproducziun è permessa pir suenter ils 14 da settember 2005.

Mandat da la rogaziun federala 2005

La regenza

a las abitantas ed als abitants dal chantun Grischun

Stimadas conburgaisas e stimads conburgais!

Il stadi e la baselgia sa chattan davant sfidas spezialas. Ils cunfins da lur activitads e da lur cumpetenzas daventan pli e pli diffus. D'ina vart s'engaschan las baselgias en numerus champs che han puncts cuminaivels cun las incumbensas dal stadi u che cruschan schizunt quellas. Pensar pon ins al sector social, als fatgs d'asil, a dumondas da famiglia e da scola ed en general a la politica sociala. Per ils medems secturs formulescha il stadi da l'autra vart savens cleramain tge ch'el spetga da la baselgia e da sia tenuta etica. Sco nova dimensiun vegn uss vitiers che tant politicras e politichers sco er represchentantas e represchentants da la baselgia tschertgan cun claras intenziuns la cuntraversa objectiva e persunala mintgamai cun l'autra vart. Quai succeda mintgatant a moda elegante e discreta, mintgatant a moda engaschada e tuttina cun la prontezza per il cumpromiss, mintgant er a moda provocanta, cun pauca chapientscha per la cuntrapart, u schizunt a moda violanta.

Ins po sa dumandar, sch'i dovra questa spezia da cuntraversa, e sche gea, tge ch'ella po eventualmain effectuar e tge reglas che ston vegnir observadas, per che experientschas positivas sajan insumma pussaivlas. Per dir quai gist al cumenzament: Ni la baselgia ni il stadi na pon sa prestar da betg prender posiziun u da s'exprimer mo a moda indistincta davart dumondas actualas fitg impurtantas cunzunt dal sector sociopolitic. Che tenutas ed opiniuns differentas collideschan en quest connex ina cun l'autra, sa chapescha da sez. I na sa chapescha dentant betg da sez, sche differentas opiniuns vegnan discutadas tranter represchentantas e represchentants da la baselgia e dal stadi a moda fundamentalistica e senza misericordia sco er senza respect envers auters puntgs da vista. Qua po la baselgia metter clers segns. I sto

esser ina da sias incumbensas impurtantas e principalas d'intermediar valurs eticas fundamentalas e valurs morales sin basa da la ductrina cristiana. A moda vardaipla po ella far quai, sch'ella va ordavant cun in exempel vivent. Tant la missiva sco er la moda e maniera da l'intermediaziun ston satisfacer a questa pretensiun. Tgi auter che la baselgia duai mussar vias da schliar cuminaivlamain problems en il senn da l'amur cristiana per la proxima e per il proxim? Tgi auter che la baselgia duai dastgar pretender da porscher in'orientaziun per la vita ed in agid en situaziuns difficilas? Tgi auter che la baselgia duai appellar a la toleranza ed al respect vicendaivel gist er en cuntraversas?

Sco che exempels ils pli novs mussan, pudess la rolla mitigianta, sustegnenta ed intermedianta da la baselgia mintgant svanir in pau. Quai n'è lunschor betg mo la culpa da la baselgia u da singulas da sias exponentas e da singuls da ses exponents. Er responsabla per quai è la moda da discurrer pli e pli dira en la politica en general. Questa moda da discurrer na sa ferma er betg davant la discussiun cun la baselgia e cun represchentantas e cun represchentants da la baselgia. Gist la discussiun tranter exponentas ed exponents da la baselgia e dal stadi purschess uss la chaschun da puspè cultivar in pau il discurs politic en general. La politica dal stadi e propostas dal stadi per soluziuns en la politica pon s'orientar fitg bain e cun success vi da la ductrina cristiana. La ductrina cristiana e sia intermediaziun tras la baselgia prestan ina contribuziun essenziala a l'orientaziun etica ed a la furmaziun da la conscienza en la societad. L'amur per la proxima e per il proxim e la toleranza n'èn betg mo valurs fundamentalas d'ina cuminanza cristiana, mabain er valurs fundamentalas d'ina cuminanza statala. Ellas accentueschan quai ch'è cuminaivel e betg quai che separa.

Il di da la rogaziun duess ans regurdar che la baselgia e ch'il stadi pon schliar mo cuminaivlamain ils problems impurtants da noss temp. Per quest intent dovri sforzs da nus tuttas e da nus tuts. Bliers conflicts na vegnan betg decidids davant ils egls da la publicitad cun il resun correspondent en ils meds da massa. Bliers conflicts ston vegnir schliads d'in uman a l'auter, en la vita cuminaivla da mintgadi, en la famiglia ed en outras cuminanzas socialas. Qua vala il medem sco per il stadi e per la baselgia. Lain ans avischinar in a l'auter, lain ans respectar vicendaivlamain, lain mussar respect visavi persunas cun outras ideas. Lain cunzunt gidar ils pli flaiVELS tranter

nus, che n'han betg la forza da sa far valair en la cuntraversa cun la vita da mintgadi. Agir en il senn da la cardientscha cristiana e da l'amur cristiana per la proxima e per il proxim, quai na duai betg mo esser oz, il di da la rogaziun, nossa finamira, mabain adina.

Cun quests patratgs recumandain nus Vus, charas conburgaisas e chars conburgais, tut noss conumans sco er nus als mauns dal Tutpussant.

Cuira, il settember 2005

En num da la regenza

La presidenta: dr. Eveline Widmer-Schlumpf

Il chancelier: dr. Claudio Riesen

Gremi: regenza

Funtauna: rg chanzlia chantunala

Data: 29.08.2005